



王忠文公文集卷之二十四

廬陵銅溪劉同編輯

鄱陽三臺劉傑校正

墓誌銘

贈禮部員外郎葉府君墓銘

至正八年正月國子助教葉君恒以官六品援著令  
推恩於父母贈其先府君承務郎禮部員外郎先夫  
人追封恭人於是夫人前府君七年卒而府君之卒  
今二十年矣恒謂予曰我先府君之壙侍講學士虞  
公爲之志而吳文正公實書我先夫人之表日月行

矣以恒之無似克有祿位于時者其來有自而褒崇所及國家廣孝治以勸勵臣子之意非藐焉小子所能當固不敢如昔人之有待而所以致此者不宜無所撰述以侈 上恩而昭先德子尚爲我爲之銘以刻諸墓上之碑予不敢辭則取二公所不書者列書之府君諱遜字謙甫姓葉氏祖父以上皆潛晦不仕世居越之餘姚今著籍爲明之鄞入初府君無它兄弟而伯父死亡嗣方病革時召府君語之曰爾其爲我後府君未知所對而目已瞑乃爲服三年喪後生二子遂以次子恂奉其祀而恩禮得兩全矣父年耄

病且殆府君焚香酌水露禱于天願減已年以贈父壽恍若覩中有神人示以三指者病隨愈後三年乃歿府君服喪過哀旣免喪猶不御酒肉人稱其純孝焉府君待人無間尊卑疏戚一以誠實尤樂周人之急大德間歲侵朝廷命富民出粟以賑貧乏有司擇鄉里爲人所素服者俾第其多寡府君首被其選大家小戶咸服其公平旣而疫大作府君致醫者爲人切脉而合藥施之門閉中賴以全活者甚衆其行修於身而惠澤及物多此類府君卒以泰定五年正月日享年六十有七明年正月日與夫人合葬縣西儀

鳳鄉青山之原夫人褚氏相府君治家有法孝于舅  
姑仁于姻族母儀婦道見稱于鄉其卒以至治元年  
十二月日而葬則明年正月日也子男二人長則恒  
由國子生釋褐授從仕郎紹興路餘姚州判官除翰  
林國史院編修官今轉承務郎遷國子助教次恂也  
爲伯祖後女二人適陳某王某孫男五人女二人昔  
歐陽文忠公之言曰惟爲善者能有後又曰爲善無  
不報而遲速有時此理之常也嗚呼以予觀於府君  
庶幾所謂善人矣雖弗克自見於世昭被融顯然卒  
以子貴享身後之榮於是有以知天之所以報施善

人者非可誣也銘曰

君子爲善旣積于躬受報或嗇後其必豐倚歟府君  
厥積維厚承之有賢徐觀身後 皇用褒贈有隕自  
天龍光所被賁于漏泉善無不報斯乃常理刻茲石  
章垂徽千祀

故孫君墓碣銘

君諱辰龍字君旂姓孫氏其先由婺之金華徙睦之  
桐廬遂爲其縣人高祖顯曾祖寶祖濂宋漕貢進士  
父之才承奉郎致仕母方氏贈孺人三子長潼發咸  
淳戊辰進士第一由衢州軍事判官辟御前軍器所

幹辦公事宋亡不仕學者稱爲盤峰先生次竟龍咸  
淳庚午鄉貢進士次即君也君資識穎敏篤志問學  
一門父兄自爲師友業成其有以自見而運去物改  
矣至元丙子國兵南伐縣燬于兵君攜家避地萬山  
中草樓露宿備嘗險艱久之乃與其兄婦復故宇以  
養親蜀名卿史公繩祖爲取承奉公誥語扁其堂曰  
志樂君事親以養志爲先不特服勞飲食而已親有  
疾憂形于色食不下咽故相畱公夢炎告老南還來  
訪君尋舊好嘉其志行嗟歎而去居喪過哀毀瘠成  
疾二兄旣先卒君獨營襄事無違禮宰木拱矣而孝

思無忘歲時祭掃猶涕泣不已教子以義方律已悉  
用禮法雖子姓來省不冠不見也然性剛介人有不  
直輒面直之有以篋貯物寓君者歲久且死則物色  
而歸其家人咸服其質實至大間部使者行部至縣  
處以學職滿考當得教官辭不就延祐初科舉法行  
人未之習君教其鄉人子弟爲之皆知所取則縣乘  
嘗修于先生而未就君繼志續成之後人故實得有  
所徵焉晚歲屏絕家務惟冥居默處間挾書史以自  
娛暇則與朋舊相羊山水間不復知有世事因自號  
曰求心云元統乙亥君年八十而十月九日乃其初

度親黨咸會宴勞累日不倦尋感疾不起二十五日也以其年月日塋縣北大隱阡先塋之次娶王氏後三年卒合塋焉子男二人師道師德孫男五人曾孫男三人昔者先生娶將作大監朱公杰之女久居義烏與禕先大父后峽府君相友善禕生也後不及識先生而君之孫紳辱與禕交因以君銘爲屬惟春秋之所謂吉德大易之所謂幽人君實侶之沒世之後其潛光逸迹誠不宜使之泯泯無聞乃爲序述其志業行誼而繫之銘焉銘曰

孝於親所以成其身求諸心所以復其真旣全旣純弗舒弗振弗替有延其在後之人

### 趙君墓銘

趙君觀光字觀國慶元之鄞人其先仕宋曾大父逢龍宗正卿兼侍講大父建知徽州婺源縣父佶翁始晦德不仕君幼多智識稍長好讀書通達時務以郡博士弟子貢得推擇試吏奉化州尋遷昌國至正十年冬黃巖海寇荐起而昌國爲州在大海中距黃巖一息可至也其州侯帖木而不花問計於君君謂今州兵寡弱且不諳水戰惟蘭秀二山居民悍勇善鬪擊習海事若募以厚賞其人必樂爲我用

用以擒賊無難矣侯然君言即以其事委君君招諭有方不擾而事集明年正月從侯引兵出海閩帥摠軍民兵同會海門洋俄而賊船百餘艘卒至衆皆惴縮莫敢進獨君所部民兵與奮戰至晚無大勝負明日君方分給軍饋巡隄上賊船又大至即說侯速進敵而賊衆數倍我軍莫支君持短兵接戰矢石交下軍與賊不可辨且後無援兵遂執節以死侯亦遇害是月二十五日也方君募民兵時或見其不憚勞勸私謂君曰侯受天子命守茲土盡忠報國固宜君不過一小吏設有功功且不顯儻有一不測寧不重貽父

母憂君曰人臣食祿死其難所也吾雖小吏亦既食其祿矣臨難以避可乎於是卒戮力捐軀以及於難得年三十有五以某年月日葬某山之原娶戴氏子男二人君爲吏廉而有守勇於趨事赴功上官悉信用之然君夫人之所能至其死事昭顯如此則有人所難能者矣嗚呼忠義天性也由之而致死故死皆無媿而世徒論其人之貴賤以爲其死之重輕何哉銘以表君之箴他日史氏傳忠義者尚或有徵也銘曰

死有不朽殺身成仁名則旣完遑卹厥身我作君銘

刻在貞珉

袁母奚夫人墓誌銘

吳郡袁君泰喪其母夫人將葬哭泣以告諱曰泰不  
天生十有四年而先君棄諸孤維是諸孤藐焉無依  
袁氏不絕如綫賴吾母左右維持以長以教故我兄  
弟克有成立獲祗厥紹袁氏之不墜繫吾母之功也  
吾母之幼也即以令淑聞爲親所鍾愛擇壻晉紳家  
我先君早以文行知名遂以婦焉時年甫十八躬織  
維親酒漿以致養舅姑承事賓祭夙夜敬共罔有違  
德自先君之沒孀居四十年艱難憂患益所備嘗我

兄弟恒以不能盡孝爲慙不幸今不及養矣泰也爰  
綴殘息厥旣得卜奉柩合葬于長洲東吳鄉緒墩先  
塋之兆而未有銘也敢惟子也請諱惟君之先君靜  
春先生之銘內翰黃公實爲之顧諱末學乃敢銘夫  
人乎雖然諱之交君有素誼不得固辭則爲序而銘  
之序曰夫人諱志寧奚姓也奚爲吳著姓吳江之同  
里其世所居也宋將仕郎諱仲常者其父也夫諱易  
宗道父即靜春先生也子男四人震以先卒次靜春  
次晉次顯也女五人長亦先卒餘則顧天麟婦德英  
顧正許德明其壻也孫男十人女六人也享年八十



有四年以至正六年十二月六日其明年正月六日  
則葬之年月日也銘曰

為婦而婦為母而母嗚呼是維夫人之德以銘其墓

陸夫人墓志銘

友人吳郡袁君信以書來告曰信私門積學往歲七月不幸喪吾母亦既忍不即死奉襄大事不一月而吾妻又卒吾哀苦良劇情有弗堪窀穸之事不能遽圖也因循踰年始克卜地以葬玄堂之銘以唯子也請禱不敢辭夫人諱順姓陸氏陸為吳郡長洲之大家姓父諱元吉母趙氏夫人資稟溫淑而性聰慧年十

有七而孤其兄慎擇所宜父歸之乃以歸于袁氏袁亦長洲著姓信字可立素以文行稱于鄉故夫人歸之為繼室而年已三十有五撫育其前室之子曰穰曰种女曰孟賢曰季寧者不啻如已出其子若女亦安其慈愛不復知已之異出也相其夫理家事內外井井有條事姑盡孝甘旨之奉必親為之及既嬰疾而姑病亦革常左右就養不少懈姑嘆曰汝事我善今顧因我以重汝疾乎因泣謝曰婦人之職主中饋養舅姑而已婦不及事先舅幸逮事大人誠能盡子婦之道死且不恨既而姑卒不起力疾理喪事哀毀

殊過比葬返哭而疾益甚遂不可爲矣夫人之卒實  
至正十四年八月十九日享年三十有七親戚里黨  
莫不爲之悲傷以爲袁氏失賢婦也夫人平居寡言  
笑行履端謹雖婢妾未嘗加以疾言遽色閨門之內  
雖雖然咸樂其宜焉嗚呼是可謂得婦道矣然而不  
及中壽以死其不可哀矣夫夫人葬以十五年某月  
日墓在某鄉某原銘曰  
黃裳元吉婦之德德而不壽天可必嗚呼夫人安此  
室

故石門書院山長吳君墓志銘

君諱益懋字仲謙吳姓處州龍泉縣人也父妙莊贈  
忠顯校尉松江府判官母章氏封宜人君性闔敏自  
幼力學攻辭章方是時爲士者未有科舉之累君所  
爲學務有諸已不資爲進取計也大德丁未歲大侵  
忠顯府君傾餘粟以賑餓者君左右其志鄉閭之民  
多賴以存活里民蔣甲爲貧故以其妻詭爲所買婢  
鬻之君旣而知其爲妻也遽遣還之不復責其直吳  
乙以田來售已庚其價矣而其弟私以半田畀浮屠  
氏訟于官悉以歸君、尋知爲其家祭田則曰吾安  
用有此而廢人之祀乎即以還吳氏有張丙者貸君

陶器貨于長沙其價不訾而舟車艱難耗折大半君閱其情凡子本合徵者盡丐之陶戶假貲於君有久而不能償者則聚其券焚之一置不問浙右大飢民流移徙他郡而大府下令拘流民反元貫在君邑者君爲具舟楫備糗糧遣送之咸得無恙而他邑所遣物故者多矣人有產子不舉而緘約置路傍者君見之惻然募人育之而重與之貲其爲人仁厚而個儻緩財急義若此類甚衆鄉邦用是多之君嘗以舉者辟松江府文學不應復用宰臣薦署石門書院山長石門在青田去君家爲近且山水最奇勝則欣然赴

之居久之乃婦旣歸遂不復以家事經意每良辰佳節從賓友尋林泉幽絕處寄興詩酒意有所適輒悠然忘返友愛其弟產業一以付之及分析唯其弟所取不與計薄厚毋舅不能自存養之終身如事其母其孝之至又如此君年三十有七以延祐元年正月九日卒元配陳氏宋朝奉大夫沂之孫女生二子曰天澤曰天濟女一人適季良繼室何氏宋丞相正獻王執中之裔孫女生一子曰清孫男四人檀楫揆柱女五人曾孫男二人熊羆女二人君卒後八年當至治二年九月某日葬龍泉鄉金沙里槎牌之原以陳

氏祔葬且四十年而楫由武功授龍泉尉乃奉其父  
天澤之命以望人葉子奇所爲狀來請銘嗚呼孝子  
慈孫之欲顯揚其父祖固何間于久近况君勇於爲  
義行應銘法宜書以範後人余曷敢曰不可因爲序  
而銘之銘曰

年不中壽仕不厚祿胡性之祥而命之不穀維餘慶  
所施益縣以篤尚後之人是似是續

故傅母樓夫人墓碣銘

里友傅權與其弟藻衰經踵門以告偉曰吾母之喪  
窀穸之事亦旣畢矣維是貞節懿範所以作則閨門

者不宜無所紀載墓上之石子幸爲之辭雖然吾母  
之詳吾悉數焉子尚有擇也吾母樓氏樓氏吾烏傷  
士族也吾母在父母家早有淑聞而我大母亦樓氏  
先君樓氏之所出外大父稔其行之良也故吾母婦  
焉於是吾母視其姑爲姑事之盡婦道其沒也治喪  
無違禮先君兄弟四人篤於友愛每時節會飲率至  
夜分吾母治具承其權無懈意先君有腹心之疾吾  
母手調藥餌衣不解帶者累旬人不見其有不堪之  
色也故廬毀于菑則銖積粒聚佐先君重構之未畢  
工而先君歿矣先君之歿也我兄弟俱在幼吾母力

持家政既克襄大事即斷髮爲誓以節義自許用撫  
育我兄弟且俾從名師游以權兄弟之無侶而能知  
所植立者吾母之教也吾母秉心既貞固不復以貧  
窶爲卹服勤紡織以夜繼日雖飄凌厲亦雞鳴廼已  
先君有宿逋臨歿時屬從子以別產爲償既乃負所  
屬吾母捐紡織之資庚之弗與較也吾母性慈祥而  
和易待妯娌如姊妹撫羣從子姪如其子咸盡恩意  
而得其驩心內外宗姪稱其賢無間言者於是年既  
七十然耳聰目明康強固無恙蓋婺居者三十年矣  
正威余忠愍公持部使者節行縣嘗題吾母所居堂

曰貞則金華宋太史實爲之記縣大夫又以耆老之  
請謂吾母貞節在例宜旌表上其事未報而吾母已  
矣嗚呼權等尚忍言之哉禕聞其言作而曰吾與子  
元弟居同里學同師夫人之賢吾知之有素矣子之  
言安敢以不志迺備著之如右夫人諱瑩字貞秀姓  
樓氏世爲烏傷人卒於丁未歲十二月十七日享年  
七十有五葬以卒之明年正月朔日墓在縣西崇德  
鄉宅山之原子男二人即權藻也權有馴行晚好浮  
屠氏學藻受業黃文獻公之門以文學名女二人婿  
曰王大節朱元禮孫男三人女四人銘曰

吁嗟夫人秉貞則兮再造厥家全婦德兮亦既壽考  
又多福兮有嘉壺儀垂楷式兮焯幽振潛勒茲刻兮

太原郡夫人葉氏墓志銘

洪武三年正月庚子中書右丞王公溥言于天子  
曰臣之父晉母葉氏實生臣溥及臣弟漢寶而臣不  
天父也棄諸孤早所恃者母氏以長以教故臣兄弟  
克有成立而母氏之亾亦已十八年顧臣無佀獲事  
陛下比者推恩褒崇二代假寵於王氏甚厚獨念臣  
去鄉邑日久儻賜之告得歸展省丘墓以伸私情臣  
不勝至願於是皇上閱焉有旨予告所以撫諭之

者良至仍勅儀曹具祭物給之公將行以母夫人墓  
宜有識請銘於史臣王禕禕不敢辭謹按追封太原  
郡夫人諱某姓葉氏饒之安仁縣人婦同里石港王  
氏爲贈資善大夫中書右丞上護軍追封太原郡公  
諱晉之配資善大夫中書右丞溥昭勇大將軍崇仁  
衛指揮使漢寶之母夫人性慈惠治家以勤儉族婣  
里黨莫不稱其賢至正壬辰干戈倣擾饒信首被兵  
明年三月右丞公奉夫人避兵於信之貴溪倉卒之  
際母子遽相失繼而公起兵衛鄉里會皇上徇地  
江右遂舉其地來附拜中書右丞分鎮建昌蓋自癸

已至丁未凡十五年夫人所在不可知而公思慕之情日夜未嘗置是歲正月忽夢夫人若告以其所在者命卜者筮之其繇辭曰非巖即冗厥得朽骨五月躬率士卒詣貴溪之桃源山即向夫人避兵處也伐林木入山以物色求之不可得哀號者三日既乃得其地居人吳海能言兵相逼時夫人病不能行即自投井中死矣公乃披榛棘尋得井俄有鼠自井中出跳入懷中旋復入于井汲井索之夫人之遺骸果在焉公哀號益不自勝以是月某日具衣衾棺槨即其地禮葬之夫人之卒享年六十有二子即公及漢

寶也孫男若干人女若干人嗚呼父母之喪入子之不幸也而右丞公則又遭乎其事之變罔極之德曷從而報之抑入子之圖報其親者固無間於存沒用是公以功業自奮出入將相勤勞王家而貶恩錫命賁及泉壤所謂立身揚名以顯其親者於是乎在是雖遭事之變而能合禮之正仁人君子復奚憾焉銘曰

顯允王公乘時奮庸入建相業出城將功載念所恃實育我躬昔丁艱難久銜哀哀孝思之至神明可通乃安體魄兆域以崇以壤以對若堂斯封天子有

命禮貴飭終龍光赫奕貴于幽宮公曰噫哉君命實  
隆豈我陋微能亢其宗精思厥繇積慶所鍾春雨在  
草秋霜在松世世子孫來瞻來同

故申府君墓志銘

府君諱佑字君佐姓申氏金華人也曾祖楚祖燄父  
鎮皆世不顯至府君始以儒術自奮有聞于時天曆  
初用御史舉署饒州路餘干州儒學教授修學宮養  
士類翕有聲譽調平江路錄事判官平江大郡民物  
殷盛興利剔蠹事功以集適歲大侵慨然白大府願  
以勸分為已任諭巨室移粟他郡食餓人全活者衆

奸人羅甲收良家女百十人抑使爲娼因交結權貴  
邀納貨賂既廉得其奸狀即白發之坐甲重罪還娼  
女良家奮不顧利害政譽大著遷饒州路德興縣主  
簿縣西五里有溪控驛道其流湍悍涉者病之相其  
宜爲浮橋以鐵繩比舟上架板皮用濟不通仍買田  
予守橋者俾以歲入爲繕修之資民便之各橋曰棲  
鸞渡曰申公生立詞橋西刻石頌之郡學田八百畝  
爲豪富民所占歲久不可理大府命理之即具究其  
實得田之形狀左驗悉與碑志合豪富民乃噤不敢  
爭田盡歸于學其政績大抵如平江辟湖廣行中書



省掾史裨贊碩畫宰臣咸器之居無何遽請休致謝  
事而歸以承務郎婺州路永康縣尹致仕距故居五  
里中和山之陽結屋曰澹庵日相羊其間世慮漠不  
以經意遂終老焉歲庚子二月某日以疾卒享年七  
十有五即以其年某月塋于中和山之麓遵治命也  
元配劉氏繼室潘氏子男二人長曰瀾用廕累調永  
康縣丞次日止女二人適唐絃徐某孫男二人將葬  
瀾奉里人邵謙所爲狀告其友王禕曰先人墓石宜  
有銘以唯子也請禕不敢辭銘曰  
申以國氏支于金華奕世載德厥稱大家是生才賢

以學自奮位則不崇燁有休聞晚贊相府庶益有爲  
胡歛其華卒弗大施惟仕與止蹈其斯正不激不迂  
爰考終命尚克有子而又有孫委祉所鍾其衍縣縣  
中和之墟闕歸玄宅匪銘不昭用刻山石

故翁君墓志銘

婺之永康有厚德君子曰翁君榮字德潤生於宋咸  
淳辛未五月日卒於元至元戊寅四月日享年六十  
有八至正甲申正月某日其孫瞿奉柩塋縣南義豐  
鄉金豚山之陽久之乃奉臨海張君顯所爲狀謁予  
銘瞿之言曰先大父雖生不有祿位無以自見於世

而德之所存有以承其先疉諸後者儻足以不朽惟是懸絳之石不宜無刻倘假以一言論次而褒美之使託以永久獨非仁人君子與人爲善之盛心乎予惟張君嘗攝令茲邑稔知君行其言可徵而瞿又辱與予游序而銘之固不得苟讓也翁氏世爲永康名族以行義稱其鄉君曾大父安大父文約父朴從父桂皆世有貞德潛晦不耀君資稟純茂好讀書通大義卓然思有所植立以繼紹其先業禮以檢身儉以理家與人交忠厚和平之氣藹然可挹也所居去縣治不數里而近足迹未嘗至城市出租稅以給公上惟

謹吏胥莫或踏其門里中有不平者咸取直於君君爲之直必使各得其平乃已或有以匱乏告輒推所有濟之不少吝者客有自睦來歸者君左右調護之使植其家至於富饒其解人之紛周人之急振善扶誼如飢渴之於飲食爲之無倦也君天性孝友母趙氏實生涯君於涯爲庶兄凡家事一付之涯略不較短長以故得母氏之驩心涯早卒撫其子如已出不幸子輝亦早世二孫煢煢字而教之咸有成立嘗自謂曰吾仰事俯育庶幾心無媿怍矣晚歲忽慨然曰人生幾兩屐耳徒碌碌何爲乃悉以家業付其孫優

游終身焉其卒也鄉里之人咸嗟悼曰翁君厚德之君子也而今亡矣乎君元配陳氏生子一人即輝也繼室章氏生女一人適應洪禧孫男二人長即瞿次琳曾孫男四人玄孫男七人銘曰

猗歟翁君自躬蘊德自其先世有累有積積久必發鍾于君躬謂宜奮揚遂臻顯融君則退然務有諸已實斂實藏弗耀弗侈彼名是競我守以謙彼利是攘我取以廉君之休休已德已有餘澤所被塋裕爾後焯幽發隱播其遺芳後欲知君視此石章

鄭府君墓銘

歎有隱君子曰鄭府君既歿之十有八年其子德裕始奉執友唐君桂芳所爲狀以銘來請德裕之言曰先君子德有以成已而壽不及艾也才足以用世而名不及顯也惟是塋且久而墓上之石猶無文以刻先猷遺懿將無以暴於後世不肖孤之罪其何以辭今幸獲交於執事不朽之託竊願有請也余惟自昔君子負其所有生不克表著於世死因泯泯而無傳者衆矣今德裕獨能圖其親於不朽其可謂孝矣迺閱狀迹其所列與德裕言合且唐君其鄉先生也爲言尤可徵則爲按狀序而繫之銘府君諱以文字彥

章鄭姓世爲徽之歙縣人曾祖南鳳宋迪功郎江東  
提刑司幹辦公事祖申道宣教郎父昭祖元奉訓大  
夫江淮等處財賦都總管府副總管奉訓公先娶許  
氏生二子長曰淵承事郎平江等處財賦提舉次曰  
深再娶羅氏宋朝列大夫龍圖閣直學士吏部尚書  
汝揖之六世孫奉直大夫新安通守厲之女生子二人  
長即府君也府君生而凝重狀貌偉然甫七歲氣象  
如老成人讀書過目即通大義爲詩歌語出人意料  
奉訓公愛之甚延名師訓教之常曰此真吾子矣不  
幸奉訓公遽捐館承事君方游京師縱萬金以結客

久畱備宿衛而深又早世於是府君獨奉羅夫人理  
家政內外井井有條遇事應物隨其鉅細急緩處之  
若絲理櫛比不少紊年饑減穀價三之一以賑貧乏  
鄉閭宗族稱其厚德無間言而產業視舊日益加承  
事君之家食也治園池構亭榭日與賓客壺觴絲竹  
以爲娛府君左右承順得其驩心而羅夫人春秋高  
且寢疾久府君奉湯藥惟謹夜則稽顙北辰願減已  
年以益母壽及居喪哀毀骨立人有所不堪撫承事  
君之子咸有成立女各得所歸其孝友純篤有如此  
府君識度明朗氣和而行夷雅不嗜仕進而樂從賢

士大夫游與之游者咸服其德器自以不及也至正  
癸未郡府列其行義上於行中書南行臺楊公衍飭  
曹公復亨皆名御史也復剡薦之當得官不報壬辰  
之夏大盜及其境以物色求之將強之出府君憂憤  
疽發於背而卒十二月某日也享年四十有九元配  
程氏浙東宣慰副使相之女繼室吳氏子男二人長  
即德裕次德堅女三人適汪誠程輻戴堯葬以甲辰  
十二月某日也在寧恭鄉小干山之原銘曰  
有豐以殖之孰奪而嗇之有振而擇之孰闕而抑之  
吁嗟乎維命實職之施之獲之子孫其食之我銘以

勒之過者式之

蔣季高墓志銘

嗚呼是惟季高之墓季高諱允升蔣姓東陽人年二  
十有九以卒至正十七年七月甲戌其卒之年月日  
也塋以明年某月日墓在乘驄鄉御史里華封塢之  
原初禱與季高同從翰林侍講學士黃公游季高之  
卒公甚哀之將為銘其塋俄而亦遽捐館遺命以屬  
之禱嗚呼禱尚忍銘吾季高耶雖然季高之交於禱  
也厚矧以公嘗有命師友之誼於是為銘非禱誰  
實宜為季高之先自漢山亭侯澄由京兆徙義興又

七世爲晉吳郡太守樞復徙臨海又十七世爲唐吏部員外郎則則之子勲爲吳越檢校司空兼御史大夫迺徙東陽又十七世入國朝爲南康路建昌縣主簿沐季高之曾大父也大父吉襄陽路穀城縣尉父玄私謚貞節先生母葛氏季高幼穎異讀書過目即成誦見稱奇童稍長益自力於學貞節君性嚴毅教訓甚篤延太末方先生麒同邑李先生亦於家塾俾季高禮而師之貞節君與兩先生皆金華文懿許公弟子其學承朱子之正傳九天人性命之奧禮樂名物度數之詳季高悉得於耳提面命而會其指歸年甫

弱冠所學已粹然一出於正矣及貞節君與兩先生繼沒季高乃束書入懷師山中博考而精思之所有旣富發爲文章動合法度而時時喜自馳聘有古作者風會黃公致政家居季高爰登其門公一代文章宗工少所許可每見季高所述作未嘗不稱賞以爲得之之晚也季高爲人恂恂然樂易不自銜鬻而議論風槩度越人表動靜出處嘗擇義而舉事母孝相其三兄植門戶振鄉閭周嫻族備極恭順以故道季高之善者內外遠邇無間言季高嘗試有司不合遂棄其業弗爲部使者舉其茂材當得官未報而季高

死矣學士大夫以謂季高之於學行進而未止將必  
遠大其材有成而志有所就孰謂不幸而輒死也故  
其死也識與不識凡知其人者皆爲之悲而學士大  
夫於此尤歎夫天者之難必也嗚呼季高之不得壽  
考以盡其材以究其志豈不有命在天而命之至於  
如此何也抑天之於君子降年不永者亦何可勝數  
而君子之所以名世則在此而不在彼嗚呼有如季  
高者因其實而論其名其亦足以不朽矣夫季高娶  
陳氏子男三人旭曄時皆幼所著有特敏齋稿若  
千卷將葬其伯兄允同復以外甥楊芾所爲狀來  
碣示來葉

墓表

故成齋王先生墓表

先生諱城字玉成姓王氏學者不全稱其字而用成  
齋爲先生稱者尊之之辭也王氏系出太原五代時  
有爲節度使曰彥超者來居婺義烏之鳳林鄉至宋  
自鳳林徙居郡城者曰三府君五世而生本贈太師  
追封魯國公本生登政和二年進士知湘陰縣贈太

速銘銘曰

命之愆弗永年名之晰可長世固茲藏無壞傷勒貞

師追封魏國公登生四子師醇鄉貢進士贈奉議郎  
師心政和八年進士累遷給事中兼侍讀權吏部尚  
書除顯謨閣直學士知紹興府充兩浙東路安撫使  
爵東陽郡開國侯贈特進謚莊敏師古亦鄉貢進士  
師德宣義郎贈太師追封楚國公莊敏次子澆知桂  
陽軍贈正奉大夫是爲先生之曾祖而楚國長子淮  
紹興十五年進士淳熙中致位左丞相封魯國公贈  
太師謚文定則先生曾叔祖也祖諱槐由大理寺丞  
知汀州終朝請大夫父諱侁將仕郎監南康北院先  
生幼穎悟資稟溫厚雅不樂華靡事唯篤志問學不

少懈初先生從高叔祖直煥章閣兩浙西路提點刑  
獄師愈嘗從鄉先生徽猷閣待制潘公良貴及龜山  
先生楊公時中書舍人呂公居仁游其子爲主管建  
昌仙都觀瀚受業東萊呂成公之門其孫爲魯齋先  
生文憲公柏傳道於鄉先生北山何文定公基何公  
得於勉齋黃文肅公榦黃公即考亭朱子門人也先  
生於文憲爲諸孫又在弟子列未嘗輒去左右而丞  
相之孫直敷文閣福建轉運副使敬巖先生似其學  
得于撫堂劉公炎雙峰饒公魯皆本於朱子復與文  
憲公諸父子姓一門自爲師友先生於敷文爲從子



故又得以朝夕承教而無間討論經義講說理趣微辭奧旨聞見日深其家學之淵源與他人號稱師弟子者不侔矣先生之學既粹然一出於正而固未嘗標榜以立異矜持以爲高同時若葉公闇者丞相衡之孫何公欽者文定之子皆與先生以風流文雅相尚爲忘年交先生素無仕進意或勉之曰世祿不可墜也乃赴銓試中其首選補修職郎監建康酒稅院未及上而運去物改因不復出棲遲先廬遂爲終焉計矣父之遺民故老日就淪謝先生與剡源戴公表元永康胡公長孺浦陽方公鳳粵人謝公翺皆以節

操相激厲時唱和於殘山剩水風月寂寥之鄉黍離麥秀之音徃徃而見讀之令人有慨然之思焉於是浙東宣慰按察二司並治於婺握帥符持憲節而來者興僚佐悉碩天鉅人若恒山周公錯隴西李公思行洛陽陳公元禮河東臧公夢解曹南完顏公貞漁陽鮮于公樞郡守倅若高平孟公淳錢唐夏公若水薊丘李公衍無不略勢分內交於先生造先生之廬無虛日或咨扣義理或商確詞翰或講求典故之沿革或訪問政務之得失先生歷歷與之言莫不厭服以謂前代文獻之遺惟先生足徵而已先生丰采明

朗儀渠淹習而冠帶偉然望而知其爲喬木故家之君子也婺爲呂成公過化之地後人因立祠事宣憲二司欲招徠學者講肄祠下圖屈致先生爲之師而先生不欲以師道自任則薦仁山金先生履祥且以書勉之出仁山文憲門人也時方高臥蘭江上因先生言不得已爲起文憲之道繇以大明故凡學者猶以事仁山者事先生焉先生生于宋淳祐丁未十二月十七日卒於今泰定元年四月二十一日享年七十有八以卒之年十一月日葬于金華縣東安期里黃批塢之原去魏國北城若干步所著詩文若干卷

手抄若干卷娶永嘉趙氏二子長邵孫次雲龍將仕郎江山縣尹致仕孫男四人閑閑閭閻並以文學世其家嗚呼宋南渡後以及于今婺之衣冠家莫盛於旺矣爵祿道德聯蟬奕葉而先生有以承其先子孫賢才是侶是續而先生有以垂其後徵諸其身不亦盛德之君子乎嗚呼雖無老成人尚有典刑自先生沒而百年之老成典刑盡矣然其所以不朽者又猶未有登載遺風餘範將遂湮微是用追述其梗概揭于墓道庶幾來者有所鑒觀焉

喻母石夫人墓表

義烏喻氏有賢母曰石夫人諱端靜字可度石姓也  
石爲浦江望族祖諱範通州泉州南外大宗正丞父  
某母某氏夫人主于宋開禧三年丁卯六月四日以  
有元至元二十五年戊子九月二十五日卒享年八  
十有二後四年辛卯某月日葬崇德鄉蓮塘山之西  
原又六十有四年其曾孫宓始謀追列遺懿揭于茲  
表宓之言曰我曾祖母夫人之幼也莊重而敏慧凡  
女工之事咸精其能好讀書史通古今大略宗正府  
君甚愛之擇所宜婦以婦于我喻氏爲曾大父登仕  
郎諱夢炎之配我曾大父本朝奉郎簽書鎮南軍節

度推官諱侃之孫諱宣子之子我五世祖承直郎縉  
雲縣丞諱南強於朝奉府君爲從弟命以爲孫焉於  
是夫人逮事祖姑朱氏朱持家甚嚴有法夫人佐其  
奉祭祀待賓客能每自得其歡心有疾躬侍粥藥衣  
不解帶者數月未歿夫人繼專家政一遵其舊故曾  
大父得不以未鹽細故爲累刻意問學用周禮領漕  
薦於江東初我高祖諱厚祖早沒曾大父旣爲之後  
而高叔祖諱潤祖於凡田產輒倍取爲已有夫人語  
曾大父曰爭之則不足讓之則有餘君幸無較焉曾  
大父泫然泣曰爾之言我之志也卒無間言夫人外

姊宋氏自幼與夫人同育宋適侍郎朱公質之子家  
既盛且有廢而無所出求子於夫人以爲繼夫人固  
辭曰繼嗣命同宗禮也今取之他姓不其起爭端乎  
朱公聞而嘆曰秉節貞潔而識見明達真賢母哉我  
曾大父既早喪夫人嫠居四十年篤于教子延名師  
訓之而親以曹大家女誡教其女每舉古人名言善  
行以勉人讀史見奸邪逆亂輒廢書而嘆及忠義節  
孝則嘖嘖歎美不已月旦望列子婦堂下命誦柳仲  
塗家訓使之聞我先祖兄弟用能以孝弟稱夫人年  
既老而動循禮度若女婦然視其色不知其喜愠雖

處豐厚而自奉極儉約常躬紡績不廢先祖每進曰  
家幸給足何自苦爲夫人曰婦人之事女工猶男子  
之事學業寧可因貧富爲勤怠乎性好施予務周人  
乏絕遭歲歉傾廩以賑糶鄰佃有通負聚其券焚之  
而雅不求福田利益也凡此皆夫人之懿行我先祖  
常舉以語密語及未嘗不流涕也密謹志之不敢忘  
子其爲書之以昭示于永久禕聞自昔風化之美皆  
本於內治而陰教行於閨門家祚以齊也維夫人五  
世祖姑黃令人事姑孝承其夫以敬御諸子若孫既  
慈且嚴家貧至鬻服飾爲資延儒先以教子其子工

部郎官良能兄弟聯登科第悉爲名工故義烏之賢  
母稱喻氏矣嗚呼夫人所謂善於繼承者耶其貞則  
嘉模誠足以軌世範俗易之黃裳元吉詩之警戒相  
成庶幾兼之是不宜無所表見庸述密之言序次如  
右夫人三子長曰京登仕郎次曰魏早天次曰高即  
密之祖也女五人長適朝請大夫通判廬州李石次  
與四俱天次適將仕郎朱程次適國學諭吳鏞孫男  
三人長曰祺爲諸父鑑後次曰祐則密之父也女  
一人適童祐曾孫男四人長即密次宣次安次寓女  
四人玄孫男一人濟女三而濟則密之子云

凝熙先生聞人公墓表

凝熙先生姓聞人氏諱夢吉字應之婺之金華人也  
凝熙者門人之所以謚先生謂先生爲德執醇而弗  
變含和而有耀以凝熙易名爲稱情也然先生非隱  
者也嘗仕于時有官位矣不見爲先生稱而稱以私  
謚者先生之德不因官以爲重故不稱其官而稱其  
德也維聞人氏系出漢太子舍人通後居于蜀宋季  
有諱韶者爲金華縣令因家焉子孫遂爲其縣人縣  
令生逸孫元初爲溫州路儒學教授教授生詵老仍  
世業儒號桂山翁翁生三歲而孤母王再適項氏翁

鞠於項氏因從其姓娶劉侍郎諸孫女實生先生乃以先生還氏聞人云先生幼有異質學知嚮方鄉先達定庵王公某與其魯齋文憲公柏崇尚伊洛之學以承朱子之傳翁皆及其門而所學得之定庵為多於是以其所得者以教先生父子自為師友夙夜磨切所資日深先生於七經傳疏悉手鈔成帙義理所在必深究而密察雖其微隱剖析靡遺凡訓詁家之說有紛拏抵牾者皆為別白是非使歸于一閉戶討論逾十年不出郊一日有紵游城南者取所藏革履御之履久弗御底腐且穿矣久之乃開門講授四方

學者咸來受業婺為憲府所治司憲者每禮致先生坐郡庠為學者師及歷仕教官所至學者爭從之游先生設教先道德而後文藝有以經傳疑義為問辦者必為敷陳眾議而以已說折衷之使其領解乃已前後學徒亡慮二千人隨其資而裁補之多為成材先生信道甚篤持已應物一本於誠涵養既馴內外一致長身山立而退然不勝衣氣貌沖粹如玄文之玉溫潤無瑕而字尹煥然平居未嘗有惰容雖祁寒盛暑常正襟危坐淵然若有思令人望之起敬即之愛慕不能舍以去蓋識與不識莫不稱為有德之君

子者也泰定丙寅先生舉進士于鄉上禮部不合繼復連中鄉貢副榜用薦者爲校官歷處州學錄衢州西安縣學教諭昌國州學正以累考及格授泉州學教授至正戊戌朝廷遣治書侍御史李君國鳳經略江南得承制封拜君嘗從先生游知位不稱其德除福建等處儒學副提舉而吏部亦以先生年勞當陞調慶元總管府知事皆不上壬寅三月某日卒于永康之寓舍享年七十以其年八月某日塋于某鄉某山之原夫人胡氏無子以弟之子復亨後女二人長適唐壽道次適胡裕夫人之姪也先生之歿門人

前翰林編修宋濂原道書院山長吳履仁和縣丞唐元嘉等既相與謀私爲先生謚又告郡太守祠之學官而濂復述其行以爲狀今國子學錄張丁嘗集先生遺文爲六卷且以狀授禕曰子吾郡人知先師爲詳冢上之石宜有刻文以惟子也屬先生禕執友也誼不敢辭乃論次如右而復爲之言曰嗚呼聖賢之學先生之所爲學也觀其立誠以致乎本推善以及於人表裏融通始終純壹稱爲有道之君子夫何愧焉嗚呼先生爲足以不朽矣揭其微猷著于貞石後之來者尚有考於斯

漳州路達魯花赤合魯溫侯墓表

元有盡節之臣曰漳州路達魯花赤諱迭理彌實字子初合魯溫氏西域人也洪武元年王師征閩閩八州不兩月而平當是時合魯溫侯實監漳郡於是守將旣以所部軍先遁郡事又屬他官總制政不自己出欲圖守禦之策計未決而總制者已納降俄報新朝使者至禮當郊迎侯從容語左右曰吾將圖之乃朝服北面再拜曰臣四十始仕不數年致位二千石國恩厚矣今力不能禦敵義不忍降報國恩者唯死耳遂斫其印篆書其笏曰大元臣子置案上即引佩

刀割喉中絕咽以死旣死手執刀按膝坐毅然如生時郡民聚哭庭下聲震地共斂葬城東門年益四十九有六矣侯早歲備宿衛用年勞當入仕以母老不忍去膝下不願仕母歿服除東宮素知其才力勉之乃仕授承直郎行宣政院崇教至正辛丑陞奉訓大夫杭州路治中尋改福州壬寅以事至京除福建行省理問官階轉奉議與福建行省平章燕只普化同赴任會盜據閩城不得入侯贊平章集諸縣民爲兵急圍城盜勢旣蹙乃開城東圍使出奔以勸兵殲之以功陞朝列大夫居三年除漳州路達魯花赤階至中



大夫時陳有定據全閩民苦其朘剝侯曰吾受千里  
生人之寄寧忍坐視弗加恤乎頗釐庶事之利病興  
除之敏於吏事而務存忠厚民受其惠甚多故其死  
也漳人無不痛思之其爲人可稱道者如此侯祖曰  
滿速兒大都路治中父曰默里馬合麻安慶路治中  
夫人回回氏子男二人長六十宿衛爲速古兒赤次  
晉顏帖木爾江西行省通事嗚呼世之論者蓋曰非  
死之難而處死之爲難侯職在守土義不事二姓而  
守其土以死可謂死得其所矣豈非盡節之臣歟余  
至漳州得侯死事爲悉因嘆八州之吏大小奚翅數  
千百而大節烈然如侯者殆不可一二數故爲書而  
表之而并及其官伐世次使刻諸石豈特以慰漳人  
之思庶用爲人臣之勸云

時齋先生俞公墓表

元既有江南以豪侈粗戾變禮文之俗未數十年薰  
漬狃狎胥化成風而宋之遺俗銷滅盡矣爲士者辮  
髮短衣效其語言容飾以自附于上冀速獲仕進否  
則訕笑以爲鄙怯非確然自信者鮮不爲之變是時  
金華俞先生獨率其家以禮深衣峩冠談說古道客  
造門肅威儀俯首拱而趨以迓至門左右立三揖至

階揖如初乃升及位又揖者三每揖皆有辭相稱慰  
慶贊周旋俯仰辭氣甚恭鄉人小子去宋久不知宋  
俗皆然或竊指先生爲異或尤以爲迂緩先生不顧  
也年七十有二卒于元至治四年正月十七日先生  
既亾而宋之遺俗無有知者矣先生諱金字叔器別  
號時齋其先杭州吳越錢氏時有仕其國爲戶部尚  
書兼營田使者曰公帛嘗道婺義烏愛其地遂遷邑  
之鳳林鄉戶部生德銓德銓生讓又徙金華之孝順  
鎮讓生海海生善轉善知各有子四人皆爲儒惟善  
智子昌言宋大觀三年上舍釋褐進士知永豐蕭山

二縣而善轉子奉復家溪南之琴山奉生某縣主簿  
允中允中生性性生咨益咨益生壽壽生義先生父  
也母金氏先生少好學善自程督鉤發窺索水溷木  
滋月長歲化壯而有名一試不合有司即退修于家  
於經史有潛心按訂較辯疑昧多所附益學者師尊  
之受業者繼于門先生年愈加志愈篤爲學晚而弥  
成人望其致于用而宋亡矣故先生之名不大顯于  
世惟發之文章以自見久而亦散軼不傳世由是無  
從知先生知而言之者鄉人而已然先生所存鄉人  
未必知之知其詳者惟子暨孫至曾孫則已踈矣使

更越數世復有知者乎篤於自信者固不卹乎人之  
知否然德如先生而弗傳則天下之爲善者寡矣禕  
是以論列之以見不苟合乎一時者乃所以合乎後  
世也先生娶王氏生四子曰祿棋枯祉而卒諸子以  
卒之歲十二月甲子葬于就日鄉義和里之楊家園  
今去先生卒時四十有六年而先生之孫有欽有奇  
有識有觀有慶有用有元多爲老成人曾孫五人亦  
已長云

烈婦李夫人墓表

嗚呼是爲烈婦李夫人之墓夫人夏氏諱婉常宋英

國文莊之裔孫九江人也年二十爲南昌李氏婦又  
十四年當元至正戊戌歲四月十六日陳友諒陷南  
昌夫人死之頃予承詔修元史有司以夫人死事來  
上亦旣書其大節列于史冊徽名峻範可不朽矣會  
其夫宗願官王朝爲國子學正與予善復請論次其  
言行之詳表于墓道予不敢以不文爲辭李氏江西  
令族也在宋世擢名科躋法從者凡數葉而宗願字  
克正自少有才譽能振其家聲夫人之父權茶副使  
德懋愛夫人故以妻宗願夫人生六歲而母沒能以  
禮自防女工旣精又讀書通大義旣歸李氏逮事其

姑左右承順得其驪心姑嘗有疾朝夕奉湯藥衣不解帶者累月以孝聞平居治家有法相其夫祀祖宗款賓客舉無違禮資性剛慧而處事過物一用柔巽族婣之間號能盡婦道者必稱夫人焉及友諒之衆來攻城夫人度旦夕城且破謂其夫曰禍迫矣吾夫妻子母萬一不相保唯當索我井中耳俄而城陷夫人與其夫若子皆相失獨攜二女匿後園叢竹中寇直其所在欲驅以去夫人探懷中金珠擲之曰我不行以此遺爾不然即殺我寇得金珠輒去而繼至者相屬度終不可免乃擁二女投井中井水淺不得死

而水旁有甃石橫出可立乃挾二女立石上有頃婢從井上呼夫人問夫與子安在婢以訛聞對曰俱亡矣夫人大哭謂二女曰我意汝父在故恐死在此今汝父既亡我不死何待又哭曰天平李氏何辜禍胡若是酷邪然吾幸身不污度無玷李氏可與我夫相見地下矣且以後事囑其女言甚悉即更自投水次女繼之既而其夫至救長女得無恙而夫人與次女皆死矣夫人時年三十四次女甫十歲明年己亥十一月五日祔葬新建縣西嶺鎮梅岡先塋之側長女曰貞蘭適舒景南子曰樾今爲國子學生嗚呼死之

於人大矣惟義是蹈而視死如歸雖君子猶難之况  
女婦乎若李夫人之死就義無難如此稱之曰烈婦  
曷有媿哉夫褒德錄美以示世勸者史氏之責也予  
是用重書其事以寓夫善善之意春秋之法具文以  
見意故亦不復爲之辭

嘉靖改元十月四日

分守浙東道委官金

華府同知張齊校刊

王忠文公文集卷之二十四終

右義烏王文忠公集若干卷吾友

篁溪祝君鳴和之所刻也刻之云

何匪徒爲其文爲其人耳昔我

皇祖龍興英賢并汲浙東之產多文  
章江右之產多節義無之者其公  
乎請言公之爲人也學純而行端

志偉而氣壯惟純也故其說遠以  
精惟端也故其辭嚴以整惟偉且  
壯也故其深長之思雋永之味浩  
然而不窮充然而有餘焉窮鄉晚  
進雖未知公死難之詳然即斯集  
而讀之則其心胷面目若親炙於

一堂之上而所謂節義者可以因  
文章而槩見矣故曰刻斯集也為  
其人匪徒為其文也刻既成間有  
一二為錄者所誤篁溪屬鵬校正  
之謹綴數語於末簡以致區區景  
仰之意云

嘉靖甲申正月穀日浙江布政使  
司左參議崑山後學方鵬拜書



